



聖宋名賢五百家播芳大全文粹卷三十五

謝表

謝宮祠表

晁无咎

罪蒙一洗幸已難逢未忘兢惕之初遽有便安之請
天不難於平旋物自慶於曲全論報無時捫心有覲
中謝伏念臣積衰之系始冠而孤本以下才甘於常
調而偶在選掄之末旋招譴咎之隨尚賴拙疎希當
事任是以頃先獲宥晚益附輕就付宮祠實養以官

曹之佚優加廩給又卹其私室之空德厚不貲愧深
罔措斯蓋伏遇 皇皇陛下躬舜大智法湯克寬董
之用威予以馭幸故明詔飾其能改而申令許以復
收臣敢不日夜以思妻孥相誓念方素飽歉孚於事
日之能惟勵赤心遵懼以終始之戒

謝宮祠表

汪彥章

臣藻言准尚書省劄子臣僚上言以臣攷試潭州進
士何烈卷子內稱臣並不舉覺回避特罷臣中書舍

人准告授前件差遣者臣子事君當謹嫌疑之戒聖
人容物止從黜免之科既聯秘殿之班仍賦殊庭之
祿惟天格寵何地酬恩伏念臣樸樾常材蹉跎半世
遇陛下作興之始在群臣推擇之中念平生值主之
難常思竒節恥私智容身之陋復踵前規故因詞命
之行務極論思之報庶絲毫之小益非蟲篆之空文
而臣意廣於才寵逾其分乃昧嚴恭之禮自投鹵莽
之誅如孟郊之應荅參差唐人或有若何武之荐薦

揚盤辟漢法豈容置散已優饗榮何幸茲蓋伏遇
皇帝陛下隆寬盡下觀過知人謂子路使門人為臣
雖誠悖理而徐邈云酒中有聖初亦何心程文尚許
子兼收攷吏奚妨於未減讞為失職斥使去朝臣敢
不追訟悔尤過為兢慎畫馬者并尾而五常負譴憂
網禽而去面之三永銜生賜

謝宮祠表

張全真

臣某言昨知紹興府以衰疾再具奏乞宮祠准勅提

舉臨安府洞霄宮任便居住者痼疾益侵弗容勉強
忱詞繼上遂沐矜從釋劇郡米鹽之勞即真祠香火
之奉感深增悖恩大莫酬中謝伏念臣蚤誤獎知備
更華近五分郡紱兩玷藩輔屬抱病以連年歎衛生
之無術以湯劑為飲食以方論為詩書身慮亡聊第
覺餘生之可厭王事靡盬更懷失職之深憂瀝危悃
以叩闈賜餘而音出綍既寬百謫復俾再生此蓋伏
遇 皇帝陛下明大燭幽仁深念舊指麾欲敵坐申

道德之威器使隨才內擴中和之化處臣之禮每隆
於體貌察臣之疾欲至於膏肓稍假便安曲全終始
桑榆之景雖已遂於燕閒葵藿之心敢少忘於傾向

謝宮祠表代徐侍郎

韓无咎

典銓法從久懷竊位之羞賦祿真祠更遂養疴之請
恩輝逾厚感涕何言伏念臣性本濶疎才仍淺陋早
緣執戟不為當路之容晚預賜環最取衆人之厚使
北庭於將變持漢節以僅還擢副民曹顧已亡於善

狀易司吏選曾不畏於多言徒知肝膽之欲輸豈謂
筋骸之難強衰頽彌甚疾發動者兩三災患相仍意
不如意者七八雖際飛龍之運自甘退鷁之蹤尚軫
皇慈曲從私志既假珍臺之佚復聯書殿之榮此蓋
伏遇 皇帝陛下德合無私功存善貸擴大明於日
月獲望清光極微命於風波少安散地示蓋惟之罔
棄俾棧豆以知歸臣敢不益佩弦韋自親藥石老馬
或知於道路固絕望於馳驅犁牛無用于山川第服

勤于耒耨誓堅晚節靡墜素風

謝宮祠表

周丞相

周踰其分宜咈民瞻詔許其歸尚叨祠秩思與天而
為大感無地以寄言臣中謝伏念臣猥以妄人生逢
昭代不自量其才力乃過切以寵榮久合投閒夙嘗
控請屬非龍之聖作疇不歸心雖老馬之力疲詎忘
戀主少需三月方敢一言誤蒙英睿之知優假弼諧
之禮王人疊至親札一放凡可示於留行已畢全於

故實逮清議弗容之際猶隆私未替之初內揆冥頑
仰辜造化茲蓋伏遇 皇帝陛下待人以恕馭下惟
公念臣早侍元良徐致保全之意知臣自貽衆怒難
專予奪之私聽辭湘水之麾俾領祥源之使擢髮不
足以數愚臣之罪捐軀不足以酬聖主之仁惟憑香
火之緣上祝乾坤之壽

謝宮祠表

王信

杜門省咎分安田里之居出綽疏恩叨賦祠庭之廩

眷繇宸念感極愚衷臣中謝伏念臣奮自諸生幸逢
昭代粵從乾道淳熙之際誤蒙 壽皇聖帝之知擢
寘周行屢更歲館郎曹宰掾戎監頌臺游陪畷域之
游旋冒禁塗之選惟知職守敢為身謀曲荷保全第
從免去不謂英主飛龍之始乃記微臣如蟻之蹤茲
蓋伏遇 皇帝陛下睿哲自天聰明協帝方紹休於
帝統首垂意於人材切觀播告之新每及論思之舊
初覃霈渥拔拭之澤優嗣拜詔音咨詢之旨切顧如

庸瑣弗忍棄捐獨於旬浹之間被此寵光之厚臣敢
不益堅素履仰答鴻私小器易盈姑竊斗升之活大
恩難報敢忘畎畝之忠

謝宮祠表

鄭丙

引年謝事將懲不職之愆優老子祠尚竊無功之祿
恩憐至矣報稱謂何臣中謝伏念臣稟資至愚謀身
甚拙勤勞書癖惟五三六經之傳奔走塵容殆四十
五年之久心勦形瘵齒豁頭童念當休影以處休且

欲息黥而補劓祈上遷於官政庶終保於天年聖度
兼容俞音尚閔憐其衰晚畀以珍臺祿足以代其耕
遂免啼飢之患食焉而怠其事難逃尸素之譏茲蓋
伏遇 皇帝陛下智燭旁昭仁天廣覆方萬物之咸
覩無一夫之或遺馬不收而烏啄瘡曲加軫念念鹿
自走而庖須肉俾免憂疑惟此橫恩全其末路臣敢
不佩葦自戒吞舌知非友麋鹿侶魚蝦自適優游之
顧先狗馬填溝壑敢忘報効之私

謝宮祠表

王 信

奉香火之緣雖愚臣之舊物拜絲綸之寵實聖主之
新恩載省妄庸倍增荷懼臣 中謝 伏念臣稟姿疎拙
際運休明比叨兩省之聯寢歷五年之久知竭忠而
報上敢避怨以謀身退道譴訶分甘閑散恭惟初政
省記孤蹤方竊祿於祠庭旋叨榮於邊聞正虞弗稱
乃得毋行茲再被於俞音俾復霑於渥惠廩人繼粟
庖人繼肉深愧罔功飢者得食寒者得衣若為報德

茲蓋伏遇 皇帝陛下緝熙萬化愛惜羣材苟非甚
無用之人常軫不忍棄之念謂臣駑鈍亦世涓塵收
其尺寸之長活以斗升之養臣敢不勉安厥守思答
所蒙第慮微軀未免月費歲靡之誚尚堅晚節以酬
天施地生之恩臣無任

謝宮觀表

晁无咎

起廢恩優薄從裁抑包荒德大終畀便安以平時不
敢僭求而一旦曲從私欲捐生莫稱洒涕自驚臣補

之誠惶誠懼頓首頓首伏念臣家世衰微人才鬼瑣
生五十一歲行身未免於悔尤仕二十四年責寔固
無於毫末流離困劇祗緣鼯鼠之技窮湔洗召還寔
遇飛龍之施普愚不知於適變狂猶念於安常一昨
罷還中銓當守遠郡惟祠宮為之加餼廩本先朝所
以優臣工豈圖棄置之餘亦被生成之賜雖乏可依
之田晦不違在望之松楸荷天至私跼地罔措斯蓋
伏遇 皇帝陛下體成王之為子本王季之事兄弥

性似先因心篤愛持循舊法開示有容故臣所蒙於
分猶過未溘先於犬馬終願馳驅亦嘗學於詩書敢
忘忠義瞻望闕庭臣無任感天荷聖激切屏營之至

謝宮觀表

汪彥章

願投散地屢奏囊封懼速煩言卒蒙薄責荷聖恩之
深厚矜微物之衰殘特與便安何勝感涕伏念臣早
緣薄技誤簡淵衷當乘輿巡幸之時歷行闕高華之
選一麾而臨千里違顏坐見於周星半歲而閱三州

奔命幾馳於百舍食息未容於黔突姓名已卦於丹
書既屈刑誅仍捐稍廩俾脫劇煩之地永全孤陋之
身茲蓋伏遇 皇帝陛下子視羣臣天臨萬物浩浩
陶鎔之大拳拳簪履之餘而臣生也有涯身其餘幾
俟河清而已見幸同父老之歌去日近以雖榮無復
軒墀之望

謝宮觀表

何文定

懇誠上瀆懼獲嚴訶隆旨下頒許從私願驚魂稍定

厚德難忘中謝伏念臣資稟冥頑生平躋蹇頃叨綸掖不敢誤朝數望權臣遂令去國孤忠莫効宿疹頓侵胡馬猖狂痛山河之失險漢儀照耀幸神武之中興召自柴門超居瑣闥與消川謗免中駭機復降袞褒延登要路湛恩稠疊盍糜殞以為期弱體尪殘恨欽承而弗獲遠闕行闕恭俟俞音特荷天慈俾安祠館此蓋伏遇 皇帝陛下乾坤合德日月齊明假病木之濃滋委覆盆之餘照俾霑饑廩不蹈風霜憑仗

寵靈雖迫推頽之景精勤藥石更圖補報之方

謝宮觀表

晁之道

阜財無術省已多愆尚汙琳館之優除益載皇慈之曲被橫流涕泗深腆面顏中謝伏念臣愚不自量妄嘗有志寧殺身而徇主不營私而為名乃一以芥公微之下才而當九府夥繁之劇任特逢睿寵殊異輩流固已懼於顛躋蓋久隘其分量非主張之有素已竄強之是加為屈公言止從薄責坐糜廩祿俾色養

之弗違盡脫憂虞冀沉疴之遂息併諧僥冒更極驚
慙此蓋伏遇 皇帝陛下格天溥臨如日徧照示之
罰而使知過加之恕而弗忍誅政庶政之惟和靡一
夫之失所乃加慈賤亦在哀矜臣敢不內訟徃愆仰
思明訓覲獲收之末路誓必踐於初心倘九死之可
酬豈餘生之敢惜

謝宮觀表

晁之道

沉痾載塗已甘殞越凌兢俟命亟荷允俞罪大恩深

慙多感涕中謝伏念臣陳力寡薄賦命遭迴滋器局
之易盈宜災疾之崇降心體俱弊精誠並衰曾不自
保於朝昏顧何以寄夫民社雖欲強勉非所堪任輒
丐領於祠宮庶獲親於盥藥私如荅枯朽更榮此
蓋伏遇 皇帝陛下明察幽微仁霑動植曲矜疲瘵
欲更安全貪戀時明倘未填於溝壑裴回莫齒猶有
報於生成

謝宮觀表

張全真

引分投閑實緣衰病籲天得請仰沐慈憐名參祕殿
之清職卮真祠之秩拜恩優渥撫已兢慚中謝伏念
臣稟性至愚謀身甚拙早從言責浸冒睿知初無借
助之游談遍歷高華之妙選得時則駕豈知富貴之
危機直道而行切慕聖賢之往躅奚經綸之小補積
尸素之深憂况迫衰殘久妨賢路輒伸悃悞屢瀆宸
旒敢為天明不違人欲許辭榮於禁地俾就祿於祠
庭雖三徑已荒無復鄉閭之舊業而一瓢可樂終為

聖世之幸民此蓋伏遇 皇帝陛下體徧物之堯仁
懋勤邦之禹績兼收羣策宏濟多艱於小大之臣各
極其器能而進退之禮曲全於體貌遂令孤藐終獲
便安繫天蓋地容莫報君親之賜雖深山林密敢忘
犬豕之忠

謝宮觀表

晁之道

赦蠲罪戾澤被庶工雖在空食亦歸舊秩寵踰其分
愧積於中臣中謝伏念臣陳力至微叨榮已甚身臥

閭里名參禁直之華官无事功居享稍食之厚每虞
滿溢更速愆尤敢期復俾於故階將使再臨於名郡
丐安舊職以養沉痾亟蒙從欲之恩彌有逢辰之幸
此蓋伏遇 皇帝陛下仁心天覆德意川流矜此衰
殘錫之寵祿和氣所被因收藥石之功旅力雖愆猶
冀涓塵之効

謝宮觀表

樓大防

杜門窮巷將沒世以訟愆賦粟珍臺僅踰時而復舊

開孤跡自新之路承大君莫報之恩得之若驚感而
至泣中謝伏念臣頃承駕綴親覩龍飛詞禁代言首
播絲綸之命經帷進讀不違咫尺之顏一去闕庭四
叩祠祿初出懇祈之切兩蒙簡記之私惟此僥逾尤
為優異雷霆所擊寧忘失箸之憂日月有明忽照覆
盆之下豈無望於歲年之後不謂得於旬朔之間顧
鑄職之告未頒而祝釐之廩已繼人謂去珠之再得
自憐墮甑之猶全頓增菽水之歡足慰桑榆之晚茲

蓋伏遇 皇帝陛下仁無棄物道本用中芝柱呈祥
方炳靈於太室玉卮為壽喜親慶於慈闈廣四海以
推恩軫一夫之失所有如間廢亦荷矜存臣敢不仰
體隆知益安愚分半九十里深嗟末路之難取三百
困徒切素餐之愧

謝再任宮祠表

汪彥章

六年循省敢逃司敗之誅一札哀矜復予奉祠之祿
孤大恩而莫報雪衰涕以何言伏念臣承學無聞饗

榮最久徒幸冒陞於班序不思祇畏於簡書自取顛
隳合從竄殛蒙虧除於大戾止投畀於遐方未綿歷
於歲時已續頒於稍廩茲蓋伏遇 皇帝陛下勵精
庶政加惠微臣雖云原貸之已多亦復棄捐而未忍
今於徒所拜此恩光捧詔天涯如獲望威顏於咫尺
銘詩座右以明復玷缺之艱難誓策疲癯終期糜殞

謝再任宮祠表

汪彥章

問官百舍敢懷故國之心循省六年復竊真祠之祿

聖恩加厚哀涕交零伏念臣推數竒窮負愆深重捫
心無可言者擢髮皆自取之惟棄置以是宜何矜憐
之敢望冒陳微懇遽奉俞音如絲如綸聳九夷之觀
聽繼粟繼肉寬百指之飢寒仰戴生成之私未知糜
殞之所茲蓋伏遇 皇帝陛下至仁惻怛大造鴻濛
謂嘗陪文石之班且久在細旃之上憐此愚戇老於
顛躓姑安處於遐荒使長霑於溫飽靡當盛夏而槁
雖隔南訛葵見太陽而傾敢忘東向

謝再任宮祠表

汪彥章

自求口實輒貢於危衷下遂物宜亟頒於俞旨既切
竿摩之懼又增尸素之慚伏念臣頃從遠方入冠法
從久無俾於毫髮居殆類於贅肱福過生災志益動
氣甫一麾而出守凜百病之交攻力丐奉祠庶幾救
死恭然疲役雖幸得以息肩儻若困拘其何施而報
國徒苟延於餘息益有負於初心豈謂隆寬復容因
任茲蓋伏遇 皇帝陛下至仁普詔大智有臨設官

分守之甚嚴控名責實之惟謹然而疾必使之有養
祿或加於無功如臣所蒙其比尤少蓋平日皆由於
忝冒而晚途洵賜以優閒臣獲此便安敢云暇佚雖
筋骸之非昔尊足者存顧年歲之幾何修身以俟

謝再任宮觀表

汪彥章

參華法從均秩仙祠本清朝優老之恩豈愚者養疴
之地猥蒙申命彌愧素餐伏念臣阻遠清光侵尋衰
朽中華未復當先之士以著鞭衆傑並馳乃效庸夫

而高枕負國涵養為時指名茲蓋伏遇 皇帝陛下
篤孝於親擇賢而輔念搢紳之長物為羈勒之舊臣
忍令中道之棄捐姑使全家之飽煖臣敢不偷安聖
日待盡餘年挂神武之冠敢言長往刻浯溪之右願
頌中興

謝再任宮觀表

樓大防

孤蹤去國六換歲華明命臨門五叨祠廩積素餐而
自媿拜黃牒以知歸中謝伏念臣處世最疎逢時多

幸把麾江海因得遂於歸耕聽履星辰今殆成於昨
夢賤齒已開於七秩親年既越於九齡無由陳力於
清朝祇合投閒於故里先疇至薄歡微祿之未忘吏
攷將更驚俞音之洊及豈止寬憂煎於數口又將竊
溫飽於二年有何勞能蒙此撫養茲蓋伏遇 皇帝
陛下躬操八柄坐制萬方念筆橐之舊臣雖無可錄
軫蓋惟之至意尚爾不遺使仍香火之緣以遂山林
之適臣敢不祇承恩渥涵泳化風菽水有餘得效萊

衣之戲雲霄在望惟存魏闕之心

謝再任宮觀表

樓大防

一收朝蹟分老瀛壖六畀祠宮誠知帝寵顧胡顏而
亟拜徒空食以懷慙 中謝 伏念臣晚幸偷安近尤多
病四支而三痛楚幾遂作於廢人十日而九呻吟惟
退量於薄命第以慈親之侍養曾無他計以謀生尚
存未盡之年更望無功之祿仰干洪造方局地以靡
遑敢謂隆寬俄自天而賜允里閭改觀耄穉交歡共

瞻新渥之光榮又獲全家之飽煖即衡門而被寵望
宸極以銜恩茲蓋伏遇 皇帝陛下大度海涵至仁
天覆俯憐簪履之舊未忍遐遺又與升斗之餘使能
粗給豈止一人之受惠寔令群下之歸心臣敢不强
整衰殘愈思感勵奉琳宮之香火每自處於幸民掛
神武之衣冠冀終全於晚節

謝再任宮觀表

樓大防

祠庭既廩其命維新勅牒臨門從天而下恍不知其

何自凜欲受以猶驚仰惟異恩敢不祇拜中謝伏念

臣才非適學不知方幸逢熙洽之朝寔冒清華之選
四載預論思之列無補毫釐平時於出處之間粗分
尋尺始因請外亟畀輔邦旋以便親力求貞館塵瀆
蓋高之聽俱蒙從欲之仁繼辱簡知再叨共理不圖
出守乃復一麾來者猶可追惟闔門而退省觀其所
以養敢謀食以自營重尋香火之緣盡出冕旒之眷
惟廬阜棲真之勝自熙陵紀年而來竊祝登陞之虛名

得與釜之寔惠喜同毛檄歡動萊衣茲蓋伏遇 皇
帝陛下覆載無私照臨丕顯選縉紳之髦士咸與明
揚念簪橐之舊臣未嘗終棄賦以斗升之奉增以儋
石之儲臣敢不益體洪私誓堅晚節為子華之母而
請粟寧待人言班周室之祿以待耕實銜君賜

謝再任宮觀表

樓大防

僻居海嶠推戴上恩游昇祠宮忽頒嚴旨慙無報國
之所喜便事親之私中謝伏念臣潦倒無堪遭逢過

分奉身而去徑歸綿上之田畏影自憐更卧漳濱之
疾當一喜一懼之交切何三仕三已之敢云幸遂投
閒庶幾養志屬書再考未免有言既徹九重亟蒙從
欲闔門相賀遂寬乞米之憂連歲何功徒致取禾之
誚茲蓋伏遇 皇帝陛下續旒無蔽簪履不遺求齊
國之勢臣尚其餘幾數正元之朝士令亦無多賜以
斗升濟其菽水臣敢不仰銜隆施退適餘生顧朝暮
承顏得效老萊之戲雖漁樵混迹敢忘魏闕之心

謝許侍養表

胡文定

瀝懇計私自投誠於君父蒙恩賜可獲供職於庭闈
仰報矜憐惟知拜舞中謝伏念臣未能自信何所取
材濫陪入彀之英徒急抱關之祿光陰荏苒蹤跡飄
零膳羞多闕於旨甘晨少夕諧於定省祇膺嚴命感
激愚衷叱馭戒塗夢寐碧鷄之佳境牽衣結戀徘徊
烏鳥之深情矧當喜懼之年深計短長之日臣而留
令無所逃誅子或委親亦將安用况鮮友恭之助已

驚血氣之衰困露悃悰冒干旒宸幸逃嚴譴仰奉俞
音伏遇 皇帝陛下孝通神明德配高厚崇八行之
舉於以明倫凡一物之微悉皆得所俯念服勤之請
俾安就養之方施等止山命輕草芥臣敢不盡心明
善務本為仁羞菽水以致歡餓體膚而弗悔學如未
至更殫早夜之思忠或可移終有糜捐之地

謝歸潁昌私第表

范堯夫

忱辭屢貢浥颯汗以方滋綸旨再頒奉恩俞之至渥

中謝伏念臣授材苦窳賦性顛蒙猥遇昌辰爰膺炳
任肆調商鼎思謹法以致和祇適漢規敢厭常而易
作卒緣昧陋深負東求再去巖廊迄投荒徼曷期晚
節蓋被殊私然臣疾病侵陵精神獲落寵還舊秩愧
竊叨榮矧以庸虛更蒙欽伋惟君子之懷道譬韞玉
以待沽邈千載之或逢豈一朝之可偶所以渭上之
老養黃耆而方來淄川之儒雖白首而猶起冥心啓
沃致時熙平士所願為人寧自廢以臣遲暮殆類昔

賢如臣遭逢豈謝前輩然嬰羸瘵莫副詳延悵時命
之多屯繫風雲之難會徒仰休明之治阻陪英俊之
躔貪戀聖時唯知彊飯何臣功之眇未重天德之溥
臨盍趨召節而駕不俟行輒籲皇穹而辭非獲已深
蒙假息弛鞭策於既疲當佩隆恩指止園而自佚此
蓋伏遇 皇帝陛下恩仁博洽盛德敷施本二帝以
親賢憲三王而養老憫勞以事不程其功命豈非常
情知忝冒捐軀報國嗟朽質之無堪雅意本朝尚精

誠之未泯臣無任

請得請表

張文潛

不能與祭自憐衰老之無堪罔俾造朝更佩恩榮之
從欲內循安便未免驚慚伏惟 皇帝陛下龍德光
亨天仁覆露牲玉備物允若神人之和同禮樂在庭
肅然祖考之來格祭則受福天且弗違臣猥以殘年
莫瞻盛事雖行不俟駕在常禮而有誅而老弗及齋
知異恩之獨厚第想光華於天漢竊同歡忭於里閭

手詔令視事謝表

王介甫

臣某言伏蒙宣示言者所奏輒具劄子乞博延公議
改用賢人伏奉詔獎勵令視事如故者謗謗議升聞
已賴舜聰之豁達懇誠上訴更煩周誥之丁寧竊以
作威者主之權待察者臣之禮蓋雖蒙非常之厚遇
亦將避可畏之煩言臣志尚非高才能無異舊惟所
學之迂濶難以趨時困欲自屏於寬閑庶幾求志惟
聖人之時不可失而君子之義必有行故當 陛下

即政之初輒慕昔賢際可之仕越從鄉郡歸值禁林
或因勸講而賜留或以論思而請對愚忠偶合即知
素願之獲申睿聖日躋更懼淺聞之難副重叨殊獎
忝秉洪鈞所宜引分以固辭乃敢冒恩而輕就實恃
明主知臣之有素故以孤身許國而無疑人習玩於
久安吏循緣於積弊竅言不忘諛行無慙論善俗之
方始欲徐徐而變革思愛日之義又將汲汲於施為
以物役已則神志有交戰之勞以道徇衆則事功無

必成之望恐上辜於眷屬誠竊幸於退藏猶貪仰附
於末光亦冀粗成於薄効比聞獨斷謂合僉言但輸
承命之忠遂觸招權之毀因請避衆賢之路庶以厭
異議之人伏蒙 皇帝陛下敦大兼容清明旁燭賜
之神翰諭以至懷君臣之時嘗千載而難值天地之
造豈一身之可酬敢不自忘形迹之嫌庶協神明之
運臣無任

聖宋名賢五百家播芳大全文粹卷三十五終

聖宋名賢五百家播芳大全文粹卷三十六

謝表

謝陳乞不允表

代王侍郎

楊文公

臣某言臣近者虔拜封章乞歸班列忽奉手詔不賜
允俞仰睿旨之丁寧撫微躬而戰慄欲更披於肝膈
慮有黷於君親中謝伏念臣孤直寡徒頑踈無取章
句之學僅能齒於諸生清白之規固克傳於奕世自
策名筮仕陳力當官塵右掖之清華踐內庭之嚴祕

乃至典樞機之務參弼輔之司並由冕旒之誤知豈
副搢紳之公議小器固難於大受高位唯恐於疾顛
夙夜在公雖僂俛而從事負乘至寇亦跼蹐之靡遑
今者訟起下民辭連執政憲府職當於推鞠獄情遽
至於矯誣既閱實以平反爰舉直而措枉已從明辯
式正常刑其如中司長官是臣外舅踐文昌六卿之
貴昧員靡兩造之辭名挂簡書身繫非所寔朝倫之
共恥在戚屬以何顏是用瀝懇紫庭祈恩丹宸願退

歸於散地庶允洽於至公豈謂 皇帝陛下推洪覆
之深仁示曲成之玄造特頌泥檢俯示綸言徵周書
之舊章以其罪不相及推漢高之大度且復待之如
初仰承雨露之私內積冰淵之具瀆尊之罪固不可
以再三許國之心但益堅於方寸誓傾臣節上荅天
慈云
云

謝降詔不允所請表

楊文公

臣某言臣近者不自揣循輒傾愚瞽屢陳奏牘上扣

天閽磬犬馬之誠蓋思報主犯雷霆之怒豈敢顧身
方懷維谷之憂忽降封泥之詔靡加罪戾曲示褒揚
撫已無從戴恩靡厚臣某中謝伏念臣論材甚薄冒
寵居多領近輔之雄藩據中台之顯位賦祿至厚殆
踰千戶之封衛社無功空忝三軍之帥徒宴安於富
貴寔覘厚於心顏屬邊戍之未寧固戎臣之思奮係
單於之頸孰不有心奉翎侯之旗人皆賈勇爰述乃
誠之懇迫兼陳奕世之夤緣以徵前朝戚屬之家未

嘗避一時軍旅之役被堅執銳必誓於身先冒刃摧
鋒庶求於死所少塞素餐之謗免貽青史之羞徒罄
勤拳終成孟浪瀆尊不已既罹犯上之愆獲罪攸宜
合正投荒之典豈謂尊號皇帝陛下俯矜僭越特
示優容未寘金科曲頒芝檢八行睿旨備極於丁寧
一介微軀豈勝於隕越仰戴乾坤之造曷酬雨露之
私臣無任云云

遷葬求郡謝賜批荅不允表 韓魏王

臣某言伏蒙聖慈以臣上表陳乞知相州或近鄉里
一郡躬親營護墳域特降詔旨不許臣襄宅有期即
當暫往者請郡以奉先塋雖違素願賜告以護親塋
亦示優恩粗安人子之誠特出聖宸之惠中謝伏念
臣鄉繇睿選擢貳樞庭方圖報以盡勤敢求安而自
逸蓋以早從稚歲二親則亡暨竊榮階諸兄繼謝比
緣西事久在兵間顧封樹之未諧每肺肝之如割逮
塵重任正偶利年尋得地於故鄉已涓辰於遠日臣

嘗私自省度至於再三輶車而弗親行寔孝心之不
忍處近位而求便假必物議之有云與其貪寵以抑
情孰若避賢而申志是以輒由衷而露奏冀解職以
為藩豈謂伏蒙 皇帝陛下念進退之匪輕欲公私
之克濟曲頒綸詔親諭玉音俾襄事之如期即馳驟
而暫往感深存歿榮耀措紳敢不舐節愈堅挺身思
奮他人之憚行者臣不憚他人之難言者臣必言儻
犬馬之未先誓靡捐而無避臣無任云云

謝乞宮祠不允賜詔表

范堯夫

伏蒙聖慈特降詔書以臣上第三劄子乞宮觀不允所請者需章既上宜於僭黷之誅溫詔發中曲諭眷存之旨仰荷矜憐之及此不知涕泗之無從中謝伏念臣以空乏之資遭休明之運進預宰司之密勿退諧鄉閭之便安寵祿滿盈慮長憂於暇室瞻視耗眊行幾至於索途內自省循義當屏伏俛安厥位有腆於顏此蓋伏遇 皇帝陛下體虞舜之聰明邁周家

之忠厚隆使臣之異數廣成物之深仁肆令罪戾之餘猶竊循良之寄臣敢不虔遵聖訓祇服官箴恩愧未醜勉就承流之效疾如終廢即祈解組之歸臣無任

謝乞宮祠不允賜詔表

汪彥章

上需頭之奏具述土思奉方底之函未容家食拜恩深厚省已衰殘伏念臣一去闕廷四叨民社雖竭從補外屢應符竹之頒然靡稱在前宜被璽書之責既

力求於置散乃猶許於叨榮茲蓋伏遇 皇帝陛下
受命宅中隆寬盡下不替惟良之選猥私亡益之臣
一心而同三千幸逢興運百里而半九十敢愛餘生
謝乞宮祠不允賜詔表 葉少蘊

誤當劇任初無屏翰之勞再荷殊私重愧遷延之役
懇期莫效被寵惟危臣某 中謝伏念臣衰病餘生空
踈未學盡力承平之日尚不克堪課功多事之時豈
能免過故瀝誠而自列幸量已以苟全詎意寬慈疊

形鑄諭推之不去深有愧於吏民義弗遐遺特見收
於君父茲蓋伏遇 皇帝陛下憂勤儉治清靜撫民
謂陳力不能雖欲自安於愚分而退人以禮尚期曲
盡於眷存故捐體貌之隆少假羈孤之迹臣屢違恩
旨勉奉訓辭力將敗而猶馳何取疲駑之用器已盈
而更受終懷顛覆之憂

謝乞宮祠不允賜詔表

張全真

嬰疾病之支離籲天有請拜訓詞之溫厚踏地難勝

恩未憇而援窮感既深而悚隕中謝伏念臣一違軒
陛遽閱三秋數奉絲綸連牧兩郡宣布中和之政拊
循凋瘵之民期德意之遐孚豈勞心之敢憚久纏羸
疾竄身已類於清漳不任劇煩臥閣殆同於東海深
虞壞曠遂露忱誠非敢專圖安便之私寔恐上誤使
令之意未蒙賜可更假褒榮此蓋伏遇 皇帝陛下
德大包荒仁深念舊以嘗承乏於帷幄或可借重於
藩垣故雖衰遲不忍捐棄報乏暮年之政宜即謹訶

賜均一札之書猥叨勞勉倘未先於溝壑誓仰荅於
乾坤

謝乞宮祠不允賜詔表

張全真

晚境卧疴忱詞屢瀆至仁藏疾溫詔嗣頒既渥而言
殫敢益深而涕隕中謝伏念臣起自三吳之故里游
更兩越之名藩意廣材疎心勞政拙顧七閩雖稍遠
在諸路為最優姦盜誦除民方奠枕雨暘順適歲有
積倉使臣自擇以居易地豈復加此况於衰謝豈不

懷安但以稟氣素孱衛生仍拙節宣無術致六珍之
陰乘湯劑因功逮三醫之徧謁遂披情赤仰扣穆清
庶幾所避劇煩暫休羸瘵亦匪專為便私之計誠恐
自貽曠職之誅豈謂慈憐尚闕俞旨頒坦明之帝制
申責孤蹤瞻咫尺之威顏敢違睿訓茲蓋伏遇 皇
帝陛下堯仁天大湯聖日躋久任以責成功兼容而
收衆智故雖病悴不忍棄捐再念臣視息僅保於餘
生精爽未還於舊觀愧丙少卿之德寧復嚮饗封非汲

長孺之賢詎能卧治終虞瘵敗上玷使令誓殫體國
之誠庶幾搨朽而摩鈍尚有首止之志終期置散而
投閑

謝乞宮祠不允賜詔表

冒貢忱辭期遂養疴之素志俯頒溫詔猥蒙藏疾之
深仁假榮便藩撫懷震惕中謝伏念臣名浮於實用
過所長二府徧更守朴忠而自信三州詳試漸善狀
之無聞福既過而挺災氣早衰而被病茲睿哲大有

為之旦正臣工思自盡之時固將効州縣之微勞庶
或佐朝廷之大計心勞跡拙欲陳力而不能外疆中
乾歎衛生之無術與其坐俟曠壞之責曷若亟披悃
幅之愚乞解麾符庶少親於藥石未頒俞旨復申錫
於絲綸此蓋伏遇 皇帝陛下廓上聖之英姿建中
興之偉業雅重牧民之寄不忘念舊之心知臣粗歷
於蕃宣當更責成於悠久謂臣雖嬰於疾恙猶堪卧
治於平時怛然深厚之辭責此藐孤之跡疏恩既渥

况瞻咫尺之威避事有嫌且懼再三之瀆欽承睿訓
勉竭駑才倘後効之可圖豈餘生之足惜

謝行在百官許乘轎表

汪彥章

臣勞於下宜無俟駕之行君恤其私至許肩輿之便
一奉綸音之渥皆如砥道之平仰服恩憐惟知感涕
臣伏以一人端拱百辟駿奔茲古今不易之規亦貴
賤相安之分故雖遲暮猶合據鞍僮在艱危何妨叱
馭豈有遵途之近乃虞委轡之傷懷塞翁折臂之憂

賜漢相小車之佚茲蓋伏遇 皇帝陛下隆寬盡下
內恕及人謂堂陛勢嚴雖俯仰有級廉之恨然腹心
情厚當戚休如手足之情方披棘以立朝適雨霜之
在候慮乘款段或至顛隕乃曲軫於睿慈俾獲安於
徐步愛念及此雖父兄何以加諸圖報謂何誓犬馬
死而後已

謝起居減拜表

司馬溫公

臣光言伏准閣門告報今月十四日內降以臣與呂

公著近各推恩轉官所有將來正謝特令兩拜起居
餘免舞蹈仍於執政官班次後別作一班及自今後
凡遇前殿應於大起居特令別作一班止兩拜起居
恩出非常禮加異數優假太過慙負愈深中謝臣猥
以瑣才預聞機政去春以後疾疹屢生入冬以來飲
食漸少迨茲歲序之首頓覺筋力之衰拜起絕艱朝
請殆廢內惟恩紀之重天地所不能踰退思績效之
微絲毫未嘗有立欲避位則為罪益大欲就列則強

力不前朝夕為衆目所觀啟處無措躬之地敢為
皇帝陛下太皇太后陛下仁霑枯朽明燭幽微特虧
著定之儀曲遂形骸之便臣詢故老或謂有舊章然
彼皆位躋輔宰之崇德著耆朋之美豈臣么麼所敢
比方欲辭則實所不支欲受則自知非分踧踖心悸
戰兢汗流惟仰賴於寵靈冀有瘳於藥物庶病遄已
禮得如初期於竭忠不敢愛死

謝免和御製元日除夜詩表 王禹偁

臣等言伏蒙聖慈特降御製元日除夜詩四首仍令
和來臣等尋時連狀謝罪乞免和今月七日伏奉恩
旨特賜俞允者聖文絕唱天道聽卑雖違善誘之心
幸獲知難之請伏惟 尊號皇帝陛下五行為質六
義游心樂天地之立功奮皇王之睿藻筆無停綴夜
乃未央煥乎四章降於三館耀日月星辰之彩發金
石絲竹之音思入杳冥乾坤無以逃其數辭包造化
鬼神不能隱乎情其元日之句也藻繪王春悅萬物

之資始其除夜之句也發揮天吏設四序之成功固
宜隨歷數而頒於華夷與法令而懸於象魏俾夫薰
絃播奏散為化下之風蒼玉雕鐫祕作昇中之典至
若周滿黃竹之詠漢高大風之歌唐太宗守歲之詩
陳叔寶初年之作義皆無取事不足徵又若除夜藏
鉤正朝放雀真為兒戲豈近皇猷通數前王實多慙
德臣等文館待罪朝行具員幸觀四始之根源徒荷
千年之際遇然而對燭龍之銜耀難炫螢光當鳳彩

之來儀須藏雉尾共思閣筆同樹降旗方傾窘蹙之
誠果降矜容之命豐隆門下免為聚響之蚊莊叟山
中甘作不鳴之雁臣等無任感天荷聖激切屏營之
至

詔進所著文字謝表

王介甫

雲漢之光俯加責冒管蒯之賤仰誤詢求中謝臣聞
百王之道雖殊其要不過於稽古六藝之文蓋缺所
傳猶足以範民唯其惻之而彌深故或習矣而不察

紹明精義允屬昌時伏惟 皇帝陛下有舜之文明
有湯之勇智以身為度動皆應於乾行肆筆成書言
必稽於聖作欲推闡先王之大道以新美天下之英
材宜得醇儒使陪休運臣初非秀穎衆謂迂愚徒以
弱齡粗知強學服膺前載但傳糟粕之餘追首大方
豈逮室家之好過叨睿獎使緝舊聞永惟少作可棄
之浮辭豈能上副旁搜之至意伏望 皇帝陛下矜
其聞道之晚假以歷時之淹始更討論粗知成就然

後上塵於聰覽且復取決於聖裁庶收寸長稍副時
用臣無任

荆湖轉運蒙恩獎諭謝表

張華崖

臣某言今月二十七日密院遞到勅書一道蒙恩特
賜獎諭者皇文昭爛睿眷重深拜恩而力若不勝揣
分而心無所措 中謝 臣聞量材授官明君之善教盡
力事主臣下之常心苟規矩之不踰則上下之交慶
臣之所佩謂之至言恭惟 徽號 皇帝陛下應運承

乾體天行道謂文為理時之本故親策賢良謂公為
御下之規故明懸教令信無幽而不燭在有物以咸
蘇昭昭然穆穆然誠千載之一會也竊念臣賤同草
芥器甚斗筭徒因總髮之年便學為臣之業以至出
隨鄉荐恭逢聖時當召試金階賜科名於異等洎掄
官天府委漕運之要司恩遇有加驚愧無盡是以身
為外事公作中謀既不敢曠職徇情惟求自適亦不
使容奸黨惡以博虛名方虞積毀以銷金豈意飛聲

而悟主爰迴聖獎俯降天書非徒一介之臣傳榮不
朽用使九流之士礪志無窮此蓋 皇帝陛下鑒洞
古今義形普率欲貪邪之易慮故廉慎以為文臣復
何功可以當此惶駭之至莫知所裁得不益勵至誠
恭遵大教雖削繁理劇未通使物之宜而竭節盡忠
更切報君之願云云

奏鄭元祐事蒙恩獎諭謝表 張乖崖

臣某言今月十七日密院遞到勅書一道蒙特賜獎

諭者恩自天來榮加望外拜伏之次惶駭失圖 中謝
臣聞君道明則臣誠著上好禮則下興讓此有國之
大章治朝之餘裕也如臣搢植无一可堪徒自出身
遭逢聖主適有采聽擢充轉輸臣雖愚蒙亮切感情
是以不捨晝夜性思公忠以便民尊主為常規以除
邪剪弊為己任遂致貪官詭怒豪吏震恐謗聲塞於
道路毀狀聞於冕旒恭惟 神斷處在不疑使臣勤
劬得盡委任此所謂 陛下至明而臣誠稍著也近

者制置使紀臣職事上達宸聰感天眷以軫憐加璽
書之慰勞臣雖不稱伏用增慙且制置使與臣生平
未嘗識面畧聞履蒞便與荐論絕古人忌黨之私見
義士徇公之節此真所謂 陛下好禮臣庶興讓也
明矣大恩莫報至聖難名但切戰兢以卜終始云

杭州蒙恩獎諭謝表

張平崖

臣某言今月十五日進奏院遞到詔書一道為本州
百姓滕超等舉留臣蒙恩特賜獎諭者臣叨任藩宣

曾無政績忽因民欲俯降天書光寵異常惶駭失據
中謝 臣聞舜稱善人即不仁者遠漢求良吏即守道
者前所以極理體之大中致生民於康樂也恭惟
徽號皇帝陛下遵漢之道行舜之心興一事未嘗不
恭儉為先命一官未嘗不惠愛為寄故得朝風寬簡
世態淳和史官但記其時雍野老不知於帝力臣叨
塵有位獲預頒條惟志在推忠莫著分憂之効而心
期濟衆未知為治之方徒以浙右近年民間小歉既

蒙明勅與捐之賦租復降異恩又賑之口粟此皆皇
猷所被民事重蘇靜言所因於臣何有顧惟下徃不
識大端譽臣之長掩君之惠敢於雙闕留舉微臣蓋
遇 皇帝陛下道在包荒恩從獎善既不 臣之僭
冒亦不究臣之曠遺便枉璽書曲形慰勞人百皆喜
臣獨未遑且以江外諸州杭為巨鎮臣之到任已踰
二年未能使民絕忿爭未能朱使吏知廉恥蒿萊之
有所不書闕欲獄訟之有所未盡空自謂孤奉舜稱

略無善行謬榮漢選不見良能是以臣受寵載驚覲
顏慙愧也得不更思休國益周竭誠求古人化俗之
方副明主愛民之旨望被萬一少報生成

益州謝降詔書獎諭表

張乖崖

臣某言今得進奏院遞到詔書一道轉運使黃觀奏
本州將吏僧道百姓等舉留臣事蒙恩特賜獎諭者
民情上達天澤下臨責寔循名未著分憂之効邀榮
冒寵難逃飾詐之訊循省所因喜愧交至中謝伏以

蜀土奧區素稱重地國家慎委本為難材况列卿帶
職之資屬為郡總戎之美衆臣之內少此兼容竊念
臣河曲微生儒門未造憑詩書為捷徑取忠義為先
聲果逢求治之朝驟有絕倫之遇入登臺省幸聯心
膺之臣出守山河全控咽喉之地故合竭誠報國百
計安民遠伏皇威奸惡少聞於屏息傍宣聖化疲羸
近似於昭蘇此蓋徽號皇帝陛下知臣向公任臣
不貳縱有闕政不能移天覆之私縱有謗書不能惑

聖明之慮是致孤臣有賴遠俗無虞竊惟經亂之人
易得在心之感謂臣滿歲必差替官輒蒙犯上之亂
因用留臣之奏曲蒙慈旨不責狂言降天上之德音
作劍南之佳氣庸知異獎推為勸善之恩却揣無功
積有臨深之懼得不更思盡瘁恭守成規庶求鎮靜
之方少輔龐鴻之德云云

益州謝傳旨獎諭表

張乖崖

臣某言六月二十五日巡撫屯田員外郎謝濤等奉

傳聖旨獎諭臣知卿為治極好得卿在彼朕無西顧
之憂庶事更切用心者邊臣之職正恐未用金口所
稱已傳不朽何此中材之質得勝絕世之榮直恐捐
軀無以報德

中謝

竊念臣出身至賤遇主非常強仕

將期方離巖谷兩髦始白方作丞郎况堅直密之資
允在得言之地恨不能長纓請試北係單于雙闕頌
功東封岱岳此國家之所不欲而卿大夫之所未裕
也一昨西蜀居人頻經擾攘九重選吏頗屬精勤臣

當奉命之初寔愜寸心之願所喜者勝殘馭遠得施
報國之勞所幸者去易就難少違偷安之謗臣是以
推誠官列示信戎行布均一於吏民亦誠勵於兇惡
併逢稔歲偶免敗官此蓋 皇帝陛下德澤四充聲
名允塞蠻夷向化邊方無警析之虞士庶歡心守土
慶下惟之治猶復居安興念用照而明傍遣使車撫
安遠俗特傳天語下慰孤臣謂臣分西顧之憂深知
不稱使臣有過身之譽以至無言但銘勸善之恩庶

保有終之節云云

昇州謝傳宣撫問表

張平崖

臣某言今月三日入內內侍高班陳文懿到州傳宣
賜臣 御機到子撫問臣疾患者螻蟻微軀雲雷重
施頓覺已蘇之如登萬舞之庭寵勵迥常感愧何盡
中謝 竊念臣河壖賤類朝右孤根徒將學古之心以
勗事君之節 先皇知臣守道擢在清流 陛下察
臣好公委之巨鎮常謂官高効淺任重才微履薄臨

深一欲少逃於官謗安民被物尤慚無補於皇風一
昨蒲柳何衰犬馬生疾據醫工切脉本自中傷用
灸以然膚即時氣正既緣在儼合具奏聞伏蒙 皇
帝陛下專命使人特頒宸翰何郡官之眇末勞天眷
以安存同暗室之睹朝陽類寒暑之遇春照篤君臣
之分遠不既名傳家世之榮久將益茂恭期畏慎以
報生成云云

昇州又謝傳宣撫問表

張乖崖

臣某言三月日入內內侍高班趙履信到傳宣伏蒙
聖慈重疊撫問臣者國有常典郡實分符何守吏之
瑣材勞聖君之重顧遠傳中旨下慰殘軀恩既有加
喜亦難盡 中謝 竊念臣幼而嗜學家本無書閭市尋
師久常涉歷策名委質始預遭逢自謂不垂而衣不
耕而食徒憑官勢坐庇宗親故檢身每切於勵精承
命不辭於艱險以至懲奸析滯廢寢忘食靜辦公家
一欲酬君之寵祿緝綏黎庶一欲答民之供承是致

迥冒寒溫有乖調護盛年抱疾向老便衰一昨西蜀
替歸中樞隸職信班行之絕迹覺聖眷之異倫其如
癖氣傍攻少納大官之膳頭瘡下瀝有慙清蹕之塵
所以臣喜遇昌期而悲逢薄祐也遂陳丹悃求蒞偏
州感動皇情俯從臣願付金陵之重地垂江界之諸
軍無廢攝生僅同卧治未期報政忽復遷官信纔迴
中貴又至瘡痍之未既沐軫憂飲食之間亦令順適
下安孤跡傍駭群情臣竊覽遺編遐觀往哲有才大

而君不用忠盡而君不知多矣若臣寒素起家清朝
見任功未著而賞厚誠未立而信深者幸也蓋遇

皇帝陛下以至聖之能守可大之業明以御下則邪
正畢見其心仁以安人則高卑各遂其性是以臣粗
推愚歛盛荷殊知豈不使四海之中九流之內壯夫
激節位快心有以頌陛下禮士之風遠逾列聖
賞微臣飾身之末無愧前賢臣之叨塵自難言喻但
期強飯一冀分憂庶敦有卒之誠少報不名之德云

云

代資政王侍郎謝降詔獎諭表 楊文公

臣某言伏蒙聖慈以臣所進鹵簿記三卷特降詔書
獎諭仍付史館者肅恭祀典聿脩郊報之儀恪謹官
常虔舉司存之職方虞淺陋忽辱褒揚仰戴恩私伏
增榮懼臣中謝竊以二帝之德由稽古以著稱三代
以還以失官而為懼蓋籩豆之事各有於典司亦方
策之文各循於故實存是彝訓昭著格言恭惟 尊

號皇帝陛下臨御寰區憲章古昔疇咨好問旰昃忘
勞講禮紬書闕遺咸秩爰以迎長之節虔修肆類之
儀拜泰時之神光盛甘泉之法從清蹕以出備千乘
恭騎之容助祭而來竭四海九州之力制度大備純
嘏荐臻臣著位深嚴親逢旦暮掌西京之鹵簿獲奉
屬車之塵閱東觀之圖書幸覲羽陵之簡輒思採摭
以助討論爰因清宴之餘遽黷紫宸之聽敢謂 陛
下特紉玄覽濬發德音恕博物之非工嘉守官之靡

忘八行獎飾脩形芝檢之文四郡編聯許預芸籤之
末荷鴻私而彌厚顧惜學以榮內省微軀曷酬殊
造臣無任云云

代僕射李相公謝降詔慰諭表 楊文公

臣某言臣數日前獲陪鎬宴遽醉堯樽侍坐不任失
儀斯盛仰陳奏牘方俟刑書忽蒙詔旨以慰安稍息
心顏之覲厚臣某中謝竊以飲不及亂載籍攸稱人
而無儀國風所刺矧居三事之任親陪萬騎之遊瑤

池之高宴方湛酣露之皇恩載洽無溫克之德上奉
當陽有載籍之羞見嗤行路玷名器之如此獲罪戾
以是宜尚蒙覆壽之仁俯矜醉飽之失諒知非於既
往永作戒於將來誓無沉湎之憊以辱崇高之位悚
惕之至啟處不遑云云

謝賜撫問表 宋公序

使駟馳星天辭出綽辱宸心之念舊因頌式以推慈
恩厚忘言感深成泣臣某誠榮誠感頓首頓首竊念

臣本由寒士早玷榮班出入近司周旋二紀石心許
國固無可轉之期川謗盈朝容致他來之吝逮違樞
握洊易侯藩席槐府之崇聯惕將壇之重寄敢謂
皇帝陛下堯仁無外漢度兼容謂體貌之嘗加眷忠
愚而可憫爰馳華牡俾道溫言薜煔惟珍特分於貢
品寶匱有爛紛照於私閔仰聆金玉之音俾極君臣
之分孤生內省隆惠奚酬但歸誓於麋捐或謝生於
覆育

中書謝傳宣表

宋公序

臣等伏奉入內都知張永和傳宣中書密院重脩開
先殿成迎奉 太祖皇帝御容徃彼供養所貴四時
薦享得伸誠意與卿等中外同慶者寶宇雄成神儀
載竝屬奉迎之伊始枉傳訓之發中睿德所覃羣心
交抃恭惟 皇帝陛下紹熙景命勤述先規曩緣作
繪之容參對不祧之禮炳然威御臨厥孫謀因佛刹
之增新命工師而度構再嚴祕殿將宅皇靈兼別廟

之宏模超化城之絕境羽旄先導奚止漢冠之游都
邑叢瞻寶聳軒臺之畏孝誠克盡前列彌昭臣等忝
服近司首聆慈誨空極親逢之幸初無云補之方惟
誓協恭或酬洪覆

謝賜詔書示諭表

韓魏王

臣某言樞密院遞到詔書一道伏蒙聖慈諭臣已除
本州觀察使且從廩秩之優益慰戎行之望者成命
之行庶乎開曉溫言以及賁若龍光惟素志之所存

懼清衷之未悉敢茲陳露良切震兢

中謝

伏念臣早

以藝文妄干祿仕幸遇 皇帝陛下首臨軒陛優擢

科名序進之階前規盡在而臣乃情吏事盡力公家

自結聖知了無私援一昨羗首背義帥府須才誤置

選中即馳塞下經畫遷徙通諭三朞為國之謀固無

云補在臣之分亦用傾竭鄉膺督護之任已明委注

之隆不期霈恩又出非望驟易樞庭之直俾分連帥

之權臣受寵無名撫躬自度不敢遠稽典故上瀆睿

聰竊記 陛下纂極以來此例甚少李維李自衡以老疾榮俸陳堯咨以侈性尚豪並遭遇承平各充其欲故議者惜臣茲授謂匪美遷臣但以處不避污事上之節讓而就賤守道之常當朝廷憂邊之秋非臣下擇官之日辭之則有可疑之迹掇希求進用之嫌受則有從權之名協軍旅稱呼之便况國家推公興治任人有次必不令臣永沈武列老於疆垂或薄效之可甄宜舊物之來復臣是以難於拒免泰然居職

今承詔諭之意專示廩秩之優緣臣清白奉身出於門法豈牽羨養之厚自損名節之高茲為伍於冗流冀同心於外禦伏望 皇帝陛下考勸功之法 知臣之明察臣甘去近聯主於恭順謂臣即當重祿靡在貪饕倘一辨於愚衷誠誓愈堅於忠報臣無任云云

涇州謝差中使宣諭表

韓魏王

臣某言今月九日入內內侍省內侍殿頭李允亨至

伏蒙聖慈傳宣為日近差除兩地臣僚未差除間以
指揮中書劄記候將來邊事稍寧詔卿用在兩地非
擬亦非臣僚奏舉特出朕意宣諭卿知兼令臣密舉
臣僚代臣邊任者聖眷特深將圖不次之用臣愚屢
省竊懷失職之憂於義當陳斯言敢妄中謝伏念臣
西畫疆事於今屢年雖勵敢為之心曾微必勝之效
偏裨失律既有罪而不誅援助發兵復無功而被賞
尚畀中權之峻仍兼四路之崇恩重報輕任隆材謏

捐軀以義乃身膏瓜斧之秋歸闕何顏絕生入玉闕
之望豈謂伏蒙 皇帝陛下仁惟及遠道本推公因
弼臣拜命之初念窮室宣勞之久密加寵諭前許近
司斷自清衷不緣它議顧蒙鄙之榮而良厚於國家
之慮則非長蓋以逆昊約和未分誠詐宿師經戰僅
起瘡痍臣與范仲淹日極謀惟粗詳方略願少寬於
銜勒得自竭於歲時庶能施尺寸之勤上以副朝廷
之寄如其禦戎無狀曠日為虞則乞擇材傑之臣使

之為代明竄殛之典以警在邊臣固不敢先自舉官
涉於希進唯幸高明之鑒俯矜切至之誠臣無任云
云

謝賜詔書獎諭表

韓魏王

臣某言七月二十五日進奏院遞到詔書一道伏蒙
聖慈為去年河北艱食人戶流亡以臣孽盡拯救特
賜獎諭者北土之饑近歲未有非上之大恩過於天
地則民之衆命委諸溝壑顧守臣之所竭惟君命之

是虔忽被詔褒得無心愧中謝伏念臣賦才甚短為

政少通自易塞垣即逢水害流庸以死者皆是饘粥
而濟者幾何洩官廩以從權則文符之交戾破羣豪
而取辦則城野之俱空故於賑卹之方務適公私之
便其利溥則或時而冒禁所益衆則不敢以愛身職
雖盡勤患且奚救幸遇 皇帝陛下深惟邦本上惻
睿慈以斯民未安而大憂以經費所侵為末事德音
一發罷悴頓蘇使傳交馳慰存良厚訖蒙再造盡出

至仁而臣任忝撫綏歲罹艱厄莫副旰宵之念坐貽尸曠之羞敢謂聖度兼容宸聰過聽特示璽書之勸蓋為邊部之光臣敢不載策駑庸動思獎勗當此饑災之後更圖安集之宜使閭里之間漸期復貫則疆垂之下自亦無虞稍脫罪誅茲為報塞臣無任云云

謝勅書獎諭上章表

田表聖

臣錫言臣今月十九日伏奉勅書以臣所貢封章特加獎諭仰荷皇明之鑒寧勝光寵之祠榮抃徬徨啟

處無地中謝臣聞敢諫非易納諫尤難蓋以臣下抗言多致觸鱗之怒帝王至貴駭聞逆耳之言苟非天鑒昭彰臣誠果敢何以見聖主優容之德何以伸直臣謇諤之心所以陶唐盛時猶設登門之鼓有虞至理許書告善之旌蓋思誘敢言之臣亦欲聞未知之事伏念臣遭逢陛下塵忝諫官雖精誠之中思有所報而激切之至未有所伸近者伏蒙聖恩榮有差遣當金殿入辭之際洎天階宣上之時遂以實封直

進御座小臣愚昧所見尋常妄言軍國要機朝廷大體退而恐懼伏待誅夷然以忠亮之心少贖貪饕之罪豈期聖造特軫皇慈優降詔書褒稱賤品乃頒御札宣示群臣見皇王鑒燭之明示天地包容之量朝廷雖理而陛下未以為理黎庶雖安而陛下未以為安自此言路洞開朝綱益振所謂堯惜一夫之不獲舜於一善而悅聞成湯之德益新大禹之謨自遠太平已致比屋可封豈獨微臣之榮諒寔天下之

幸臣無任感恩荷聖激切屏營之至

謝詔書宣諭表

張全真

臨遣星輶撫傷痍之遠俗俯頒帝綍形惻怛之溫言

仰睿渥之東漸騰歡聲之北拱

中謝

恭惟皇帝陛下

下躬禹勤儉性湯寬仁揔攬權綱體德刑於冬夏巡行方嶽省耕斂於春秋顧黎元久困於干戈慮詔令徒施於墻壁深求民瘼益固邦基尚憂聖澤之未宣分遣始華而申諭選求時望假之憲府以重其事權

賜對便朝付以璽書而稽其課最欲大蘇於涸瘵期
盡掃於煩苛武夫感涕以銜恩癯老扶携而觀化臣
猥司屏翰謬布教條念久侍於清光亦粗知於德意
坦然明白奉以周旋何止楚王拊三軍而挾纊敢師
漢吏期千室之鳴絃

謝詔書獎諭表

王豐父

沃壤千里本睿算以經營賜札十行辱天褒之優渥
鼓鐘導從父老俱瞻喜動公庭光生私室中謝竊以

稽山故國鑑水巨湖昔失渺茫則就其深而瀦水今
茲堙塞乃因所利以為田仰神考之有為自熙寧而
經始幅員幾七百里首尾逾五十年浸厯居諸益多
高仰與其為強民盜占而私已孰若立法制拘利以
供官曩緣文陛之對揚親奉邃旒之清問欽承密旨
來治餘疇悉稟宸謨曾无費於毫髮坐興厚利誠有
補於倉箱迨此第功獨先假寵祇奉綠綈之賜實切
華衮之榮茲蓋伏遇 皇帝陛下道冒八該明照萬

里紹帝勲而高古耕王籍以勸農撫撫周原咸被涵
濡之澤茫茫禹迹載成經啟之功臣自視疲駑謬當
委寄既乏居官之可紀又豈有功之足知政愧潁川
誤奉褒揚之詔情同天保願歌歸報之詩臣無任

謝詔書獎諭表

張全真

瞽言冒獻瀆已懼於再三聰聽兼容慮不遺於千一
肆頒溫詔俯賁寒蹤稽首拜恩銘心戴德中謝伏以
允離狂悖挾虜騎以長驅睿主憂勤整戎車而夙駕

天威臨赫士氣賈餘紛萬旅以爭先裒群策而並用
臣頃陪帷幄久備藩垣衰遲蒲柳之姿蹇淺蒟蕘之
論初非言責祝敢意於代庖切歎時危發靡遑於恤
緯輒披悃悞少助詢謀敢謂仰契廟謨特形天獎煥
發絲綸之重蔚增簪履之榮此蓋伏遇 皇帝陛下
文即康功湯昭聖武陳師鞠旅捷書屢上於甘泉舍
已從人訪問每勞於衢室猥加勞勉誤及庸虛一札
十行不替終始之遇四郊多壘示通遐邇之情臣敢

不味深厚之訓詞體蓋容之大德老當益壯哲言九隕
以為酬知無不言庶萬分之或補

聖宋名賢五百家播芳大全文粹卷三十六終

